138. Glarus bestätigt die Ehrlichkeit der Einwohnerschaft in Werdenberg und bewilligt eine Fahne (Fähnlibrief)1565 April 29

Landammann, Rat und Landleute von Glarus urkunden, dass vor der Landsgemeinde in Schwanden die Abgeordneten der Landleute der Landvogtei Werdenberg, Ammann Andreas Gasenzer, Weibel Felix Mader, Paul Schwarz, Hans Tischhauser und Mathias Wolf, erschienen sind. Sie bitten die Landsgemeinde, ihnen eine Urkunde auszustellen, dass sie ehrliche, treue und gute Untertanen seien. Vergangene Ungehorsamkeiten ihrer Väter sollen ihrer Ehrbarkeit nicht mehr schaden. Auch bitten sie die Obrigkeit, ihnen eine Fahne zu verehren, damit sie sich in Kriegszeiten und bei Kriegszügen ordentlich zeigen und darstellen können. Seit der Ungehorsamkeit ihrer Vorväter gegenüber ihrem Landesherrn werden sie in der Nachbarschaft als meineidige, ehrlose Leute angesehen, was ihnen schadet. Da sie laut Gnadenbrief von 1525 nie als meineidige, ehrlose Personen angesehen wurden und auch heute keine Schuld mehr tragen, bestätigt Glarus der Einwohnerschaft ihre Ehrlichkeit und bewilligt ihnen eine Fahne für Kriegszeiten. Die Glarner Landsgemeinde hat das Recht, einen Werdenberger Landsmann als Fähnrich zu wählen, und wählt Paulus Schwarz zum ersten Werdenberger Landesfähnrich.

Der sogenannte Fähnlibrief ist eine Folge der Ereignisse von 1525 (vgl. dazu ausführlich SSRQ SG III/4 110). Der Werdenberger Bewohnerschaft wird damit ihre Ehrbarkeit bestätigt, die seit 1525 besonders in den benachbarten Ländern angeschlagen ist, und sie werden mit einem eigenen Banner beehrt.

Wir, der landtamman, rath und gemein landtlüth zů Glarus, bekhennend unnd thůnd khundt allermenncklichem offenbar hiemit disem brieff, das alsdan wir uff hütt, den letsten sontag im aprellen, do man zallt nach der geburt Christi thusent fünffhundertsechßtzig und fünff jare [29.4.1565], zů Schwanden, an einer offnen landtsgmeind nach altem, loblichem bruch und jarlicher gewonheit unsers gemeinen landts sachen wegen by einanderen versampt gewesen, alda für uns an ein offne landtsgmeind kommen und erschinen sind unser lieb und gethrüw underthonen, burger und lanndtlüth uß unser herrschafft Wärdenberg, mit namen Andres Gassenßer, ammann, Felix Mader, weybell (beid gesagter gstalt unser amptslüth daselbs), Pali Schwarz, Hans Tischhuser und Mathyas Wollff, als verordnete sandtbottenn, und liessent in namen gemeiner burgeren und landtlüthen unser vorgemelter herrschafft Wärdenberg mundtlichen fürtragen und anzeigen ein sach, die sich vor jaren zů den unrhůwigen zythen, so sich fast allenthalben inn Tütscher Nation¹ under den underthonen erhůbent, ungefelligklichen begeben und zůgetragen.

Namlich, das sy, unsere underthonen, burger und landtluth zů Wärdenberg (die dozmalh warent), ettwas unbillichen vorhabens unrecht für die hannd genommen und sich wider unns als iren rechten, natürlichen oberherren ettlicher dingen unbesinntlich in ungehorsame gelegt. Darus sy gegen unns domalen in ungnad und straf gefallen und aber doch uß gnaden mit inen gehandlet worden (luth eines brieffs, darumb ufgericht)². Diewyl aber jetz ouch inen, so sidhar uferwachßen, ennetthalb Ryns und sonst usserthalb landts, fürgezogen, verwissenn und gescholtten werden, sy sygend meineydt lüth, die ir eydt und eer

15

an uns als iren herren nit erstattet und solliche schmächliche, unehrliche zumässungen offt mitt großer beschwerd und hertzlichem beduren hören müßen. Allwyl sy sich mit offnem urkhundt unser hierüber erkantnuß und das wir sy für fromme, ehrliche und thrüwe underthonen haltten und erkennen, nit entschlachen und verantwurtten mögenn.

Unnd so sy nun als die sidhar uferwachßen nach ouch ire nachkommen deß beschechnen überträttens nützit vermögend, deßhalber ouch billich nützith entgelltten söllen, so belannge ir aller gemeiner burgeren und landtlüthen unser graffschafft Wärdenberg gantz demüthig, underthenig und hochflyßig pitt an uns als iren rechten, natürlichen oberherren, deren eigen lüth und underthonen sy sygennd, inen schrifftlich und mit sigel bekrefftiget urkhund günstigklichen mitzetheilen, das wir sy für fromme, redliche und thrüwe underthonen (als sy dan nit anderst verhoffen) achten und haltten und das vergangen inen an eeren unschädlich syn sölle, damit sy sich nach eeren notturfft, wie frommen, biderben underthonen gebürt, veranttwurtten tetten und entschlachen können, dan sy nit anders gesinnet, dan fürbaßhin (wie ouch bißhar by ir zyth beschechen), alles, das jemer und allweg ze thůn und ze erstatten, so thrüwen, willigen underthonen und eignen lüthen gegen iren rechten, natürlichen herren ze thůn zů staat und sy jeder zyth schuldig und pflichtig sind etc.

Danne ouch diewyl sy bißhar in kriegsuflöuffen, zügen und nöthen dehein zeichen ald fenndlin sich gebruchen und füren mögen, sy aber da am anstoß des Ryns unnd ennd der Eydtgnoschafft gelägen, und wo sich unrhuwen und kriegsempörungen erheben oder sy inn gemeiner Eydtgnoschafft sonderbaren orthen ald unsers eignen landts nöthen zů hilff und bystannd ervorderen, ufzesyn und uszůziechen geheissen wurden (da sy dan ir lyb, ir läbenn, gůt und blůt als schuldige, thrüwe underthonen yeder zyth gern darstrecken wellten), one zeichen und fenndlin wenig ordnung und anmůths gewunnen und geben wurde.

Und dan ouch ettlich herrschafften und gemein und sonderbar vogttyen der Eydtgnossen, die dise lanndtschafft Wärdenberg mit der mannschafft nüt überträffen, eintweders mit paner oder fenndlin befryet, so syge ouch ir, aller burgeren unnd lanndtlüthen unser vilgesagten grafschafft und herrschafft Werdenberg, gantz underthenig und höchst pittenn an uns als ire rechte, eigne oberkheit, sy ouch uff dißmalh mit einem zeichen und fenndlin gnädigklichen zu vereeren, ze befryen und ze begaben, damit sy sich inn gemeinen und sonderbaren kriegssachen und empörungen dester ordenlicher und krieglicher yerder [!] zyth ouch erzeigen und darstellen konnen etc.

Unnd so wir söllich, ir underthenig, ernstlich pitt unnd begeren beider stucken der lenge nach und mit mer worten (die alle hie zů mellden nit von nöthen) verstanden, haben wir uff den ersten anzug, den darumb vor jaren ufgerichten, besiglotten brieff (so wir by unseren handen) offentlichen verläsen lassen etc.

20

Und so wir nun uß sollichem brieff nit vermercken, das inen, unseren gesagten underthonen, domalen uferlegt, das sy meyneydt lüth erkhennt ald söllennd gehaltten werden, sonder sy an ettwas altten rechtsamungen gfält, überträtten und darumb gestraft wordenn. Ouch die gegenwürttigen, so jetz inn läben sind und ire nachkommenden, an dem vergangen gantz und gar dehein schuld tragen, sonder sich thrüwlich, gehorsammlich und gewärtig bißhar allweg bewisenn und fürther ze thun (als wir inen das wol verthruwennd), sich underthenigklichen darbiettent.

So erlütherennd und bekhennend wir uns hiemit, das wir, offtgemellte, disere, unsere underthonen, haltten und das inen obangezogner, vergangner fäler weder denen, so jetz inn läben sind, nach denen, so innkhünfftigem syn werden, gantz und gar dehein nachtheil gebären, sonder inen an eeren, an eydt und inn all ander weg unschädlich, unufheblich und verwissenlich syn sölle gegen allermencklichem, jetz und hienach, zů allen zythen, doch diser hievor angezogner und verhörter brieff irer entzychung halber und sonst fürbaßhin und allweg also in krefften gentzlich beston und plyben, alles inn krafft diß brieffs.

Unnd danne deß anderen artickels halber, das zeichen unnd fenndlin betreffende, diewyl sy denocht, so nach am anstoß gelägen, da sich glych ettwas empörung und uflouffs erheben möchte, und sy sich ouch inn nöthen und kriegen einer loblichen Eydtgnoschaft und besonders unsers landts Glarus thrüwlich darzeträtten, jeder zyth frywillig ze syn darbiettennt und erzeigennd, wir uns ouch deß zuo inen versechennd, so haben wir ir pittlich begeren nit weigeren nach abschlachen können, sonder inen den dickgenanten, unseren thrüwen, lieben underthonen, burgeren und landtlüthen unser eignen herrschaft Werdenberg, ouch allen iren eewigen nachkomen, für uns und aller unser nachkommen, gunstigklichen ein zeichen, nammlich ein fenndlin von guoter sydenn geschennckt, verehret und begabet, darinn das allt Werdenbergisch waapen, ein schwartzer phau im wyßen felld,³ sol gemacht, gestelt und gefürt werdenn. Also das sy und all ir nachkommen deß fürhin jemer und eewigklichenn von uns gefryet und genoß syn und plyben söllenn, one inred und intrag menncklichs, doch mit disen nachvolgenden anhengen und vorbehalttungen:

Erstlich das wir, gmein landtlüth zů Glarus, allwegen ein fennderich an einer landtsgmeind mit meerer hand (doch uß inen, gemeinen burgeren und landtlüthen zů Werdenberg) selbs wollen dargeben und verordnen, der uns dan zů söllichem eerenampt ehrlich und redlich beduncken und gfallen wirt und habennd grad erstlich und uff dißmals an diser landtsgmeindt zů einem fennderichen erwelt unseren lieben, gethrüwen, obgemelten Pali Schwartzen, der dan und andere, so inkünfftigem darzů erkhießt werden, zů dem fenndlin schweeren und loben söllen, wie kriegsbrüchlich unnd gebürlich ist.

Zum anderen sol sich das fenndlin hinder unserem landtvogt zů Werdenberg uff dem schloß jeder zyth behallten und liggen. Und wann sich empörungen,

krieg und noth (darvor unß gott, der allmechtig, ewigklichen uß gnaden verhüten welle) zütragen und unser landtvogt sy uß unserem bevelch uf syn ald uns zü hillff und bystannd zü ze ziechen, ufmanen und ervorderen wurde, als dan sol von einem lanndtvogt inen das fenndlin zü handen des verordneten fennderrichen jeder zyth zügestelt unnd übergeben werdenn, sy dasselbig zü velld tragenn, darunder ziechen und reissenn. Und nachdem die unrhüwen gestillet, angestelt ald befridet, und man widerumb zü huß zücht, sol allwegen das fenndlin widerumb uff das schloss an die gwarsami zü handen eines landtvogts getragen und beleittet werden.

Zum dritten, ob sich zů trůge, das sy, unser gethrüw, lieb underthonen, burger unnd landtlüth zů Werdenberg, mit söllichem fenndlin zů unns in das velld zugindt, so haben wir unns vorbehaltten, das wir alsdan dasselbig fenndlin unserem gůt beduncken und gfallen nach underschlachen und dieselbigen ußzognen kriegslüth under unserm paner ald fenndlin, wie wir den zemalh zů felld und zů krieg zogen, ziechen heissenn und liggen lassen wellen und mögen.

Unnd zum letsten, so habennd wir unns ouch luther vorbehalttenn, so und sich die vilgesagten, unsere underthonen, burger und landtlüth zů Werdenberg, über kurtz oder lanng ungehorsamm, widerspennig ald einichs můtwillens und unrechtens und nit fromme, thrüwe underthonen und eigen lüth irer pflicht nach schuldig sind, haltten, fürnemmen und erzeigen wurdenn, deß wir uns doch zů inen deheins wegs, sonder aller thruw, gehorsams unnd guotes versechennd, das wir alsdan oder unsere nachkommen inen disere bewißne eeren, gethat und fryheit deß zůgelaßnen und geschennckten fenndlins wol widerumb ufheben, hinnemmen und entsetzen und nach irem verschulden unnd verdienen als unsere eigne lüth und underthonen ferer straffen und nach unserem gefallen und gůtbeduncken mit inen handlen und fürnemmen mögen.

Unnd zů beschluß, so sol ouch diß alles, wie hieob geschriben und von uns vergunt und verwilliget worden, uns, gmeinen landtlüthen, weder uns noch unseren eewigen nachkommen an unseren rechtsamungen, eygenschaffttenn, fryheitten, herrligkeitten und gerechtigkeitten unser graffschafft und herrschafft Werdenberg deheins wegs schädlich nach vergriffennlich syn. Unnd aller obgeschribner dingen zů waarem, vesten urkhundt, so habenn wir, obbemeltte landtamman, rath und gmein landtlüth zů Glarus, unsers lanndts das gröst insigel henncken lassen an disen brieff, der geben ist uff sontag vor ingenndem meyenn, was der nun und zwenntzigist tag monats aprilis, im jar, do man zallt nach der geburt Christi, unsers einigen erlösers und seligmachers, thusennt fünffhundert sechßtzig und fünff jare.

[Vermerk auf der Rückseite von Hand des 16. Jh.:] 14. Anno 1565, am letzten sonntag im april, erschienen an der landsgemeinde in Schwanden der amman Andres Gasenzer, der weibel Felix Mader, Paul Schwarz, Hans Tischhauser und Mathias Wolf als abgeordnete

der grafschaft Werdenberg und stellten ein zweifaches gesuch. Erstens baten sie um ausstellung einer schriftlichen urkunde, das sie nicht, wie ihnen früherer unruhen wegen oft vorgeworfen worden, ehr- und eidlose, sondern vielmehr fromme, ehrliche und treue unterthanen seien. Und zweitens hielten sie um ein eigenes fähnlein an. Beide bitten erfüllte die Glarnersche landsgemeinde und gestattete den Werdenbergern, bei militerischen auszügen ein fridens fähnlein mit dem schwarzen pfau im weissen felde zu führen, das eben auf dem schloße aufbehalten^a und jedesmal^b dort abgehalten^c werden muste.

[Registraturvermerk auf der Rückseite:] Nr 4; No 14

Original: OGA Grabs O 1565-1; Pergament, 65.0 × 49.0 cm (Plica: 11.0 cm), Wasserflecken; 1 Siegel: 1. Glarus, Wachs in Schüssel, rund, angehängt an Pergamentstreifen, bruchstückhaft.

Abschrift: (1719 Januar 1 – 1722 Januar 1) StAZH A 247.8.1, Nr. 3; (2 Doppelblätter); Papier.

Abschrift: (1720) LAGL AG III.2458:025; (2 Doppelblätter, 7 Seiten beschrieben); Papier, 21.0 × 33 cm.

Editionen: Tschudi 1726, S. 12–15; Senn, Chronik, S. 126–131.

- ^a Streichung: werden.
- b Streichung mit Textverlust (1 Wort).
- ^c Korrektur unterhalb der Zeile, ersetzt: aufbehalten.
- Vgl. dazu SSRQ SG III/4 110.
- 2 SSRO SG III/4 110.
- Offenbar das Wappen, unter dem die Werdenberger in den Krieg ziehen. Nach Hilty 1898, S. 13, ist es das Werdenberger Stadtwappen, da die Landleute kein Wappen besitzen.

15